

Generacija maturanata sarajevske Druge gimnazije iz 1982. ponovo na okupu

# Proslavili 25 godina od mature

**Razasuti smo po svijetu, ali ovakvi susreti se ne propuštaju**

E. DUVNJAK

**SARAJEVO** - Maturanti Druge gimnazije iz Sarajeva, generacija 1978/1982, proslavili su juče 25. godišnjicu mature.

Njihov ponovni susret u školskim klupama nakon 25 godina praćen je i smijehom i suzama. Dosta ih živi u inostranstvu i u Sarajevu su došli samo zbog proslave godišnjice mature. Nakon što su se sastali ispred škole, svako je otišao u svoj razred na prozivku, a 11 je odjeljenja.

"Sav se tresem od uzbuđenja. Lijepo je ponovo vidjeti svoje drugove i drugarice iz školskih klupa. Razasuti smo po svijetu, ali ovakvi susreti se ne propuštaju", kazao nam je Eldin Hotić, učenik nekadašnjeg IV2 razreda, koji sada živi u Beču.

"I ja vani živim i došao sam samo zbog proslave mature. Bilo je puno nestašluka i dogodovština u tim gimnazijskim danima i sa radošću ih se sjećam", dodao je Sreten-Kiko Popović.

Prisustvovali smo susretu učenika IV10 razreda i njihove razrednice Nevene Šerić, koja je u jednom momentu, kao i nekađa rani-

Diriljiv susret bivših đaka Druge gimnazije



FOTO DŽ. TORCHE

je, morala povisiti ton i zamoliti ih za pažnju.

"**Divno vas je** poslije toliko godina ponovo vidjeti. Niste se mnogo promijenili. Ispričat ću vam za početak jednu anegdotu. U autobusu se vozimo jedna profesorica ove gimnazije i ja. Toliki je žamor bio da sam jedva čula šta mi priča i odjednom ona vikne: 'Tišina', prvo je nastao muk, a zatim smijeh u autobusu. Mislila je da je u razredu", ispričala

je profesorica Šerić svojim bivšim učenicima.

Emil Kapić, bivši učenik IV10 razreda Druge gimnazije, kaže da mu je u životu mnogo pomoglo znanje koje je stekao u ovoj školi.

"**Mogu vam reći** da su dani provedeni u ovim klupama jedni od najljepših u mom životu. Sretan sam što sam ponovo vidio svoju raju", rekao nam je Kapić.